


百川學海



第十冊

淳熙玉堂雜紀卷上

東坡志林

錢文僖公惟演金坡遺事云舊規學士六人遇聖節

共率百二十緡寺中設齋今送五十千與樞密使同

開道場前一日赴宴當時所記如此近歲樞密院滿

散聖節及貢院賜宴則學士待制皆與而無送錢故

事又六參隨樞密班先入止是再拜不舞蹈并遇宣

麻不往皆內朝故事也

金坡遺事又云聖節唐時惟六學士及二使謂中書

赴待詔雖發書屈亦不與坐又云本朝淳化五年

十月上賦詩一首令待詔吳郢張用和齋以示學

士張洎錢若水又李昌武宗諤翰苑雜記學士初授

中謝前一日待詔一名至私第宣召入院聽口宣舞

蹈訖揖待詔上階相見具酒果迎待即以事例物并書致於待詔前熙寧間司馬文正公日記云初除學士待詔李堯卿宣召設香案褥位於庭望闕堯卿稱有敕光再拜堯卿口宣云云光每句應喏畢再拜舞蹈又再拜升階與待詔坐啜茶蓋中朝舊典也今學士院有待詔四人或古選或白身予爲學士忠翊郎錢滋來宣召大略如李馬二公所記而無對揖茶酒之禮例支十千辭云自來虛喝不敢受予強予之常日學士入院坐堂上朱衣吏初贊喝東院錄事某人以下躬喏訖又喝云各祇候次贊喝西院某人以下亦如之最後平贊云待詔旣不名亦不喝各祇候則待詔與院吏固亦有間若平居則視之全與吏等無由待以茶酒豈將命時不欲吏之邪抑 祖宗時所遣或翰林他局之待詔邪然唐制發書屈赴聖節禮已厚矣

李仁父燾續通鑑長編開寶二年 太祖命李昉盧多遜分直學士院昉前在翰林堂吏因事至者每拜堂下事已即遣未嘗與坐至是拜堂上更展叙中外無復曩日之禮昉愕然詢同列則云數年矣 司馬文正公日記云熙寧二年五月癸巳鎖院以奉安二御容禮成德音降西京囚杖以下放是日丞相出中書提點魏孝先以下入院授以參政趙抃所封御前劄子茶湯館于虛閣御藥劉有方來茶湯館于門塾復謁御厨翰林設食致酒果黃昏進首尾詞內

批依此修寫四鼓起讀點句攢點進入明日丞相退
朝宣訖開院淳熙三年十一月八日必大被宣草十
二日冬祀赦黃昏方至院御藥持御封中書門下省
熟狀來繫鞵迎于中門同監門內侍一員俱升廳御
藥先以熟狀授監門共茶湯訖先送御藥出院復與
監門升廳受熟狀付吏又點湯送監門下階館之門
塾而不報謁既熟狀自內出非參政所封故提點官
不來惟中書門下省刑房錄事尚書省刑房主事各
一人穿秉同至仍舊繫鞵見之不迎不送不設茶湯
而退守當官四人貼房十數人旅揖階下與文正公
所記多不同至六年九月十二日復被宣草明堂赦
御藥張安中監門梁襄相見如儀惟錄事沈楨主事

李師文茶而不湯院吏云前不設茶誤也守當官等
不復廷揖所謂酒饌之賜今皆無之詰朝奏知先出
而吏卒輩皆俟三日後宣赦訖乃得歸

太上初遜位上尊號時陳丞相康伯當國集議定命

學士洪景巖遵撰議文然後降詔必大時任察官心

知其非而無由改乾道六年郊祀禮成加上尊號必

大在翰苑始引唐故事乞上帥羣臣過宮表請既允

然後降詔國朝止有人主上母后尊號故冊文稱嗣

皇帝靖康上 教主道君之號徐丞相處仁已命汪

彥章藻代作冊文會有疆事不及行禮紹興三十二

年初上 德壽尊號乃承例用嗣皇帝乾道六年上

既表加乞上尊號而院吏寫表亦稱嗣皇帝私謂未

安謹按唐明皇傳位後顏真卿議肅宗不當於宗廟稱嗣皇帝况親奉表德壽乎以白虞丞相允文丞相難之必令尋例必大思建炎以後遇節朔遥拜徽宗表是時翰苑多名士必不誤用乃督吏搜舊牘明日果得表本一冊止稱皇帝又按韓文順宗實錄載憲宗上順宗尊號冊文亦稱皇帝臣某此最可據其議遂定

是歲初議於太上皇帝尊號中加憲天體道四字皇后加慈明二字必大草詔云太上皇帝與天同大體道之宗太上皇后如月之明以慈爲寶蓋取文意之順耳將宣布而議者謂天聖二年賜太宗女申國大長公主謚曰慈明當避於是改用明慈二字

宰執云詔書先明而後慈殆默定也

必大與同直院鄭仲益聞既分草皇帝請加上大

上皇帝皇后尊號牋表諸公謂太上皇帝自當答

誥頗疑皇后難於措辭必大請以意共爲答誥文意

所及總言父母以該之而不稱予吾之類遂草以進

上甚以爲然凡兩答誥皆必大所草也

上於文字尤欲得體一覽便見是非必大草太上

辭尊號第一誥其末云怡神閒燕何力之有上曰

此雖道太上語畢竟自此起草送去何力之句不

能無嫌必大遂改作無累於物蓋上用意至到如

此

淳熙二年六月禮部太常寺申來年太上皇帝當

慶七十欲將國朝加上尊號升 壽典禮參酌比附
先次討論壬申有旨恭依七月乙酉侍從禮官等就
都堂議加性仁立德至神無為八字而皇后再加二
字為齊明廣慈後兩日禮部趙侍郎雄謂無為二字
與 太上字相連頗涉語忌請改為明武煥文其後
又嘗作至神無為又作成武煥文逮癸卯乃定用性
仁立德無為全美參政龔實之茂良而下尚不以為
然葉丞相衡既主之眾莫能奪八月直院胡長文元
質罷丁卯 上自用必大再直已擬詔草會九月乙
未葉丞相罷龔參首招予及學士王季海共議然後
定為性仁誠德經武緯文遂草宣布詔其頌 太上
皇帝云以德行仁本性誠之固有修文偃武合經

之自然 太上皇后云月齊日以得天而能久照坤
順乾而配地是以廣生 上再三稱獎謂數句用經
語該括明備非卿不能為真大手筆也
大禮降御劄既云劄示則當親筆付外近歲同常詔
從院吏寫本行出未知中朝舊事如何乾道九年六
月七日宣當直學士草南郊御劄三更進草其間云
乾清坤夷振四方之綱紀星暉海潤兆百世之本支
玉卮每奉於親闈瑞節歲交於鄰境 上改作農扈
屢豐戎軒載戰崇禮樂而四達嘉風俗而再淳玉卮
每奉於親闈美化遂刑於海宇仍批云可改簽抹者
五句意不近於郊祀其欲得體大率如此
己亥三月丁卯詔今歲郊祀以例約束省費旋有旨

未令行出下禮部太常寺議明堂大禮初李仁父主此說於前郊嘗經集議會近習揚言熹博極羣書却不曾讀孝經乃不果行至是予以禮部尚書兼翰林學士與諸儒議曰周公雖攝政而主祭則成王王方幼冲故周公參稽古制歲事於明堂其曰嚴父者指周公能推本武王之志追尊文王之功非謂自主其祭祀也衆以爲然遂奏臣等竊觀傳載黃帝拜祀上帝于明堂唐虞祀五帝於五府歷時既久其詳莫得而聞至禮記始載明堂位一篇言天子負斧依南鄉而立內之公侯伯子男外之蠻夷戎狄以序而立故曰明堂也者明諸侯之尊卑也孟子亦曰明堂者王者之堂也周禮大司樂有冬至圜丘之樂夏至方丘

之樂宗廟九變之樂三者皆大祭祀惟不及明堂豈非明堂者布政會朝之地成王時嘗於此歌我將之頌宗祀其祖文王乎後暨漢唐雖有沿革至於祀帝而配以祖宗多由義起未始執一本朝 仁宗皇祐中破諸儒異同之論即大慶殿行親享之禮並侑祖宗從以百神前期朝獻景靈宮享太廟一如郊祀之制 太上皇帝中興斟酌家去舉行於紹興之初亦在殿庭蓋得聖經之遺意且國家大祀有四春祈穀夏雩祀秋明堂冬郊祀是也陛下即位以來固嘗一講祀穀四躬冬祀惟合宮雩壇之禮猶未親行今若特舉秋享於義爲允臣等謹據已行典禮及將前代賀循本朝名儒李泰伯范鎮明堂嚴祖說并治平

中呂誨司馬光等集議近歲李燾奏劄具錄以聞乙亥有旨從之九月上辛以顯肅后忌前改用仲辛行禮辛酉當受誓戒前一日上語宰執足指瘡腫恐妨拜跪欲展季辛又值顯恭后忌如何宰執奏天地尊后忌卑遂降旨用二十六日必大按漢武太初太始征和中屢祀明堂不專用辛方請別卜日詰朝上忽遣中使諭旨都堂夜來傳藥足瘡良愈不必改日但已展誓戒之期若再降旨不張皇否趙相奏此却無妨遂以是日午時集官受誓戒丙寅大雨丁卯鎖院草赦戊辰百執事冒雨入麗正門過後殿請皇帝致齋己巳上乘逍遙車朝獻景靈宮入太廟宿齋四日之必大雨晝夜傾注通衢殆如溪澗有旨來

早不乘土輅止用逍遙車徑入北門趨文德殿致齋朝服導駕官皆改常服應儀仗排立人並放趙相爲大禮使密諭有司未得放散黃昏後雨驟止夜分內侍李思恭傳旨御史臺閣門太常寺仍舊乘玉輅應合行事件疾速施行庚午昧爽駕來登輅必大執綬上喜曰且得晴霽辛未行禮月色如晝上拜起不倦以迄于成黎明登樓肆赦簪花過德壽宮人情熙然赦書乃必大視草其間云惟周成宗祀洛中陟配於文王惟漢武合祠汶上推嚴於高帝皆用親郊之禮具殫尊祖之誠於鑠本朝若稽前代俛經路寢有皇祐之彝儀徧秩羣神有紹興之近制不愆于素可舉而行蓋欲明著古禮以示來世也後數日加恩羣臣

必大復草趙相制云裸將太宮霖潦驟霽陟恪大寢
月華正中又云鎮定大事如彥博之恢宏貫通羣經
如宋庠之博洽皆紀一時之事且以仁宗初行明
堂二公實為相也大禮赦條乃六部諸司條具上省
省中類聚取旨訖即進熟狀降付學士院草赦文本
院并首尾詞大書進入其間多云當議將上取旨蓋
有司擬申如此既經畫旨行赦便是處分不應仍舊
用當議二字必大為學士諭令削去院吏持不敢遂
親以筆塗之

大禮 上乘玉輅率命翰林學士執綏備顧問近歲
多闕正員臨時選差他官與五使同降旨淳熙丙申
南郊巳亥明堂必大再為之按京師用唐顯慶輅嘗

以登封其安固可知元豐改造已不能及今乃紹興
癸亥歲所製 上自太廟服通天冠絳紗袍乘輦至
輅後由木陛以登惟留御藥二宦者侍立執綏官先
從旁用小梯攀緣而上衛士以綵繩圍腰繫以箱柱
輅行頗搖兀宸兀亦覺危坐云

大禮後 上御樓揭雞竿肆赦皇太子及文武百僚
拜舞于下惟樞密使翰林學士相對侍立樓上丙申
巳亥必大扈從再登麗正門望濤江形勢環抱極壯
觀也

乾道七年四月甲子詔皇太子判臨安府用至道故
事也或謂當以太中大夫為判官通領府事恐名稱
未正遂議改尹而以侍從為少尹餘判推官用卿監

郎官丁卯將鎖院降麻或又疑宣麻又疑宣麻給告
非待儲貳之禮已已後省官禮官會議於史院檢照
唐太宗征遼命太子監國及大帝命太子受諸司啓
事或詔或制規麻爲重可以作則 上然之庚午偶
當日被宣范紫微成大先以侍講遞宿聞報遽出薄
莫至玉堂御藥李名持御封御筆皇太子某宜領
臨安尹可依此降制三鼓進草因奏此制書旣不給
告則當付有司施行竊恐皇太子別無被受欲依自
來詔書體式格換首尾書寫一通降付皇太子今擬
定格式進呈如賜俞允乞速批降付下御筆批依辛
未遂告大廷惟此稀闊盛典適以史官備討論詞臣
參潤色復得宸翰寶藏于家非儒生之榮遇乎

答皇子詔用卿字非是前輩知體則不然其他或汝
或王或公皆當有別

翰苑歲進春端貼子如大內多及時事 太上則詠

遊幸之類 必大嘗自德壽宮後垣趨傳法寺望見一

樓巍然朝士云 太上名之曰聚遠而自題其額仍

大書東坡賴有高樓能聚遠一時收拾與閑人之詩

於屏間又靈隱寺冷泉亭臨安絕景去城旣遠難於

頻幸乃即宮中鑿大池續竹筒數里引西湖水注之

其上疊石爲山象飛來峰宛然天成 必大作端午帖

子云聚遠樓頭面面風冷泉亭下水溶溶人間炎熱

何由到真是瑤臺第一重蓋謂此也前後頗聞禁禦

大略併記于下宮中分四地分隨時遊覽東地分香

遠梅堂清深竹堂月臺梅坡松菊三徑菊咲清妍

醴清新木犀芙蓉岡南地分載忻大堂御忻古栢

石射廳臨賦崎瑰燦錦金林至樂池上半丈紅郁李

清曠木犀瀉碧鱗西則冷泉古梅文杏館靜樂壯

丹浣溪海糶子北則絳華羅木旱船俯翠茅亭春桃

盤松其詳不可得而知也嘗見御製盤松贊墨本云

天錫瑞木得自欽岑枝蟠數萬榦不倍尋怒騰雲勢

靜奏琴音凌寒鬱茂當暑陰森封以腴壤邇以碧潯

越千萬年以慰我心碑在宮中又汪季路遠得御製

祭土地文藁真蹟寶藏之其文云維淳熙五年歲次

戊戌十一月日太上皇帝遣具階張宗尹特

設牲牢旨酒珍果香花致祭于本宮土地之神神有

百職職各不同典司草木土示是供我遊湖園乃獲

竒松植之禁苑百態千容娑娑偃蓋夭矯騰龍翠色

凝露清音舞風醉吟閑適予情所鍾壟培封殖久或

力窮鳥鳥外擾蟻蠹內攻神其勦絕勿使能終精邪

竊據盜芥適逢神其呵逐勿使遺蹤常令勁質坐閱

隆冬堅踰五柞弱異雙桐歷千萬年鬱鬱葱蔥牲牢

旨酒嗣錄汝功尚饗

歐陽文忠公學士院草錄世已不傳近歲有玉堂集

云是李漢老那編類亦差訛非全書其中却載皇太

子府春端帖子蓋政和宣和間所供今東宮乃闕此

欲引例為請緣無善本可據且當時不曰宮而曰府

遂止王安中內制

淳熙玉堂雜紀卷上

淳熙玉堂雜紀卷中

乾道七年十二月辛酉有旨僕射之名不正欲採周漢舊制改左右丞相令有司討論必大時爲禮部侍郎兼權直學士院又兼同修國史兼實錄院修撰皆當與聞會衆議不齊而虞丞相亦謂同北虜官制遷延至明年正月戊寅僅條具歷代宰相官稱申尚書省禁中即聞之明日遣中使王德其來問緩故必大以實奏二月癸卯得御筆云尚書左右僕射可依漢制改作左右丞相學士院降詔登時具草封入乙巳付外施行庚戌從駕過德壽宮旣歸得旨赴東華門祇候宣引日巳晡聞有內宴小黃門出云恐改日引然不敢退酉後忽宣入選德殿起居畢上微被酒

袖出親劄云比來一二大臣同心輔正夙夜匪懈
革苟且之風以副綜覈之意深可嘉尚今因除授宜
示褒典虞允文可特進左丞相梁克家可正奉大夫
右丞相御前設小案用牙尺壓蠲紙一幅傍有漆匣
小歛硯真筆墨於玉格必大鞫躬書除目進呈訖奏
曰拜相轉官前例固不一今並命而或三或四更取
聖裁 上曰以其協心故褒進之然特進一官即少
保所以允文三官又問兼樞密使否 上曰今樞密
亦非古先改丞相稱呼將來別理會且帶可也又奏
所領書局 上曰卿自理會賜坐奏問既改左右相
其序位如何 上曰欲升在三少之上三公之下逮
閣請起宣坐賜茶飲訖再拜而退御藥李邦直同自

複道秉燭鎖院蓋 上意欲其密故不用尋常宣官
之禮金蓮故事今庶幾焉凡鎖院御藥監門中官各
一負御藥留宿其廳大鑲或先去恐是昧爽再相見
以小字制書本授之送至中門先啓鑰入內即復扃
院俟朝退宣麻訖學士乃得歸時虞公獨相梁爲參
政聞班列中但謂改易相名及雙制出愕然或疑學
士多轉右相一官有所抑揚不敢辨也按 祖宗時
命相多以舊官其後往往遷秩近歲勅局修三省法
乃著令轉三官茲豈當立法乎
乾道七年七月二十六日午後快行家傳旨下學士
院取從官爲四川宣撫使體例蓋是時參知政事王
公明炎在蜀三年屢求歸宰相薦吏部侍郎王能甫

之奇為代故來索例必大令回奏云降麻官方屬本院侍從當問三省既暮忽宣鎖至院已秉燭中使出御封御筆乃王炎除樞密使依舊四川宣撫使其密如此吏寫熟狀依例不轉官但加食邑必大方草制未暇細思既得筆依奏方省其誤自寫奏云本朝改官制後以太中大夫為宰執官當時改樞密使為知院事中興以來既復置使首用舊弼故恩數多視宰臣未有以中大夫充者昨汪澈元是通議大夫虞允文太中大夫故不轉官今王炎止是中大夫竊慮合轉左太中大夫仍加封邑庶協近制御筆批依時三鼓批墨尚濕必大初直院見批答臣僚章表皆大書其後不過三

兩行表紙盡則接以詔紙數幅文盡乃止然表紙自詔紙矮參差不等問之掌故並無依據心每疑之其後徧於執政故家求承平時舊本偶得仁宗皇祐間答孫威敏公丐辭免副樞表則所接之紙高低相若淳熙乙未再叨寓直閏九月十二日因李參彥穎王樞准斷章批答即具奏照皇祐體式於表後用一等紙書寫進呈仍乞今後準此施行御筆依遂為定制

宰執及親王使相太尉生日天章閣排辦牲餼預申學士院撰詔書及寫賜目一紙各請御寶詔用書賜目錫勳前一日差內侍持賜其詔例畫撰進之日謂如正月旦生文意必敘歲首而所畫日則是去臘殊不

相應必大為直院奏乞不拘進詔早晚但實畫生日於後得旨從之遂為定制 祖宗時牲餼外又錫噐幣往往就差子弟姻戚持賜欲其省費也過江惟牲餼耳米麩本色羊準價皆取之有司酒則臨安醞造臨時加以黃封拜賜訖與使者同升廳搢笏展讀就坐茶湯書送錢十五千從人三千天章閣使臣庫子快行錢酒各有差

淳熙丙申八月庚辰德壽宮遣大璫張去為至都堂傳旨立翟貴妃為今上皇后明日午後執政奏事皇后歸姓謝氏乙酉晚快行家來宣鎖院是日侍講刑部侍郎程泰之已宿直呼馬而出予至內前適與之遇泰之揚鞭云留詩案上矣酉時出自東華門入對

德殿

上曰

太上有旨立謝后命卿草制必大

奏合略及歸姓否

上曰不如此四方何由知明言

幼隨乳母可也宣坐賜茶訖御藥王濛同入院二鼓後進草畢吏呈泰之詩云抖擻身章却冒塵衰蹠顧影也逡巡鑿坡寓宿非其地蓮燭操文自有真字直由來同古語位高兼復見今人迎潮有諾無輕爽季老當年不諉貧謂賜金也予次韻戲之云天街並踏軟紅塵飛鞚交馳駭徼巡椒殿敢期當制草槐庭元擬用儒真初謂年兄鬻方偶免冬龜手適市深慙旦攫人禮絕同僚應有日重露潤筆乃無貧謂相制亦賜金也先是七月十九日六曹長貳六人往浙江亭觀潮泰之在焉惟予以內直不赴晡時大雷雨走筆

戲蔡子平洗云雷轟萬鼓勒潮回無復亭前雪作堆
應爲尚書慳且澁盲風恠雨一時來迎潮輕奕之語
指此

淳熙丙申八月乙未都堂召議賜交趾來年曆日詔
書予謂李天祚去冬已薨龍翰未經封拜欲作安南
國王嗣子龍翰執政然之先是予以兵部職事條具
天祚贈典按故事其王初立即封交趾郡王久之進
南平王死則贈侍中南越王上以天祚自紹興丁
巳嗣位今四十年淳熙元年二月又自南平王特封
安南國王故欲厚其禮予請仍贈侍中追封南越國
王詔可之安南爲國蓋曾丞相之失聞奏章行移舊
上稱安南道加封之後浸自尊大文書稱國不復可

改丁酉三月二十四日制授龍翰靜海軍節度觀察
處置等使特進檢校太尉兼御史大夫上柱國安南
國王食邑三千戶食實封壹阡戶仍賜推誠順化功
臣予適當制其云即樂國以肇封旣從世襲極真王
而錫命何待次升蓋言不封郡王也交州在唐爲安
南都護府本朝太宗時黎氏奪丁璿節度大中祥
符二年李公蘊復篡之傳子德政至孫日尊嘗稱帝
改元日尊卒乾德嗣卒陽煥嗣卒天祚嗣卒龍翰嗣
生數歲矣制云乃眷一邦茲傳七世自公蘊言之也
其名曰日曰乾曰陽曰天曰龍皆有僭上之意然表
章字如蠅頭幾不可辨玉音每嘉其恭順云
淳熙三年九月二十五日鎖院付下中書門下省熟

狀趙伯圭除使相提舉洞霄宮必大奏按故事宗室
戚里或前宰執帶節度使多充宮觀使若至使相自
領使無疑昨史浩以使相提舉宮觀者誤也恐自此
遂以爲例今具士樽錢枕等例皆是以使相充宮觀
使在外任便居住者合取旨改正一更四點進入五
點 上批可依士樽等體例除宮觀使

是年十一月二十二日御封付下參知政事錢良臣
辭免監修國史日曆所劄子降詔不允必大因奏自
來宰執兼領書局多是內尚書省批出局名既至朝
廷降勅合行寫正而省吏止奉行內批宰執亦隨勅
黃繫銜差誤日久今因答詔輒具言之國史日曆者
書名也曰所者官司也今大臣合監修日曆却添一

所字似監修造作之官又如勅令所從官詳定宰執
提舉今却云提舉勅令所此何理也以至國史院會
要玉牒皆爲一律合行改正 上以爲允其後或是
或否復混淆矣

丁酉九月丙辰宣召侍讀史少保浩錫宴澄碧殿抵
莫送以金蓮燭宿玉堂直廬上命作詩叙此會史進
古詩三十韻云季秋中澣日淳熙隆四禩朝回攬轡
間中使俄傳旨少頃日博申宣召陪燕喜預令掃玉
堂深夜備棲止悚懼跽承命鳴騶亟穿市絳闕聳皇
居非煙常靡靡入自東華門熊羆森爪士詔許乘肩
輿安徐無跛倚復古距選德相望幾數里脩廊按雲
漢岩堯瓌珠藥中途敞金扉恍若蓬壺裏羣山擁蒼

壁四顧環弱水山旣日夕佳水亦湛無滓冰簾映綺
疏瓊殿中央峙澄碧耀宸奎龍神爭守視蹈舞上丹
墀天威不違咫尺奉觴祈萬壽時蒙一啓齒餘波丐鼠
腹酒行不知幾徘徊下瑶席緩步煩玉趾從遊至清
激錫坐談名理泉聲韻琴瑟一洗箏笛耳皇云萬機
暇觀書每來此論道及帝王直欲齊其軌堯舜禹湯
文前身無乃是臣言匪獻諛道實由心起旣然明是
心要在力行爾登橋醕餘罍飲興未容已金蓮引雙
燭再拜離階祀玉音寵諭臣此會宜有紀歸途感恩
榮占寫忘歌賦上御製俯同其韻云揖遜荷帝堯
寅恭五元禊治道貴清靜聖言有深旨誰歌元首明
自得股肱喜躋民期仁壽距肯中道止力農樂彼田
坐賈安於市歲行閱豐咎國論銷委靡予力初何能
濟濟賴多士矧予有元老中立而不倚居東逾三年
不遠來千里未遂赤松遊輟誦青琅藥皓首持六經
日侍明光裏翼乎鴻遇風縱矣魚在水儒行絕瑕疵
道心無塵滓挺挺松柏姿巉巉山岳峙予惟日萬幾
至仁同一視西成錫小宴促坐才尺咫湛露愧歌周
置酒非封齒歸美見新詩如卿能有幾眷言澄碧行
勝賞得迂趾亦屢引公卿對此談政理虛心欲受人
忠言資逆耳朕瘠天下肥至樂無易此頗念文武疆
六合尚殊軌東都會諸侯宣王昔於是期爾罄嘉謀
使我勲業起勿以方燕頤所書聊復爾卮酒正須醕
話言未能已都護萬年觴何當至庭祀文章藉老手

直筆中興紀載嘉矍翁焉得辭翫敲逮十一月壬寅輪當內直申時二刻宣召至清華閣上曰學士宴見無時最為親近朕和史浩詩待錄示卿可和以進此學士職也又云卿想不甚飲比賜宴時見卿面赤却至誠不辭既退中使李肅傳旨賜詩本并戊戌小春茶二十銖葉世英墨五團以代賜酒世英御前墨工也恭進和篇云粵從三代還歲月過千禩時豈無賢君道未契宸旨陛下屢語臣三代而煌煌唐太宗勲業在所喜寇攘既掃除蠻貊畢至止循良布郡邑惠政寬獄市忠賢儼班聯切諫柅浮靡關輔羅府兵巖穴聘奇士民生覆焉安國勢泰山倚皇心期過之風下九萬里忠厚培本根文物繁華藻淳熙正觀

間何啻相表裏屬車尚濤江列障隔淮水蠢茲獯鬻氏作我大清滓坐令營屯衆久費糗糧峙中原厭狼貪諸將空虎視安得貫罟桔來貢尺有咫六合混一家耕桑盛生齒願言講治道先務當有幾欲仁斯仁至患在未舉趾而况前史中遺事可尋理衛英爪與牙王魏目兼耳處中賴房杜虛受忘彼此不聞國異政但見車同軌孰云古道難僉曰今王是寸陰聖所競盛德日方起舞干格三苗其効之旬爾軻稱仁無敵傳謂禮可已東鞮及比女看即朝玉祀南山竹易殫陛下功難紀儒館謾獻歌將奈詞之體是日奏事畢問陛下命臨安府開文海有諸上曰然奏云文選之後有文粹已遠不及所謂文海乃近時江鈿編

類殊無倫理書坊刊行可也今降旨校正刻板事體則重恐難傳後莫若委館閣官銓擇本朝文章成一代之書 上大以爲然曰卿可理會奏乞委館職上曰待差一兩頁其後遂付呂伯共 祖謙 旣成 上問何以爲名 必大乞賜名皇朝文鑑 上曰善又降旨令 必大 作序亦旣進呈將刊版會有近臣密啓云所載臣僚章疏毀及 祖宗政事遂不果刻今其書士大夫或傳之

淳熙五年閏六月十二日鎖院付到熟狀皇子魏王自荆南集慶軍節度使開府儀同三司行江陵尹判明州改成德彰信軍節度使行荊州牧 必大 奏彰信是曹州 徽宗曾爲節度使即位後并興仁府又親

王帶牧合隨本鎮今成德軍即真定府却帶荊州牧

非是 上批別擬大鎮進入選點更具本鎮帶牧故

事來 必大 又奏去夏魏王除荊南節度使江陵尹誤

犯端拱中 真宗除授昔政和中已失檢照今因改

鎮不敢不審兼兩鎮合帶兩牧仍隨本鎮併於實錄

中檢故事以進夏夜甚短奏入已三鼓至四鼓未批

出只於兩鎮上就本鎮止帶一牧 必大 遂擬永興成

德軍節度使雍州牧進入頃之點定然後進草禁中

未就寢以待

禁中四鼓乃在外三更

故事食邑千戶以上封侯若拜相雖舊爵卑食邑少

亦徑封侯蓋五等伯子男用縣名至侯則升郡當降

旨時未知所封何郡第云進封開國侯而已秦丞相

薨後初拜沈守約該左相乃侯元忠高右相沈爵歸安縣乃侯陽武縣各從其鄉也既相合升郡侯而學士院遂進沈為歸安郡乃侯陽武郡初非郡名其誤甚矣當時偶不知改父之因進書轉官方能釐正至今遇恩升郡臣僚院吏及吏部尚復差舛謂如元係吳興縣開國伯則合云進封吳興郡開國侯却云吳興郡進封開國侯殊無義理予每為正之

北門掌內制西掖掌外制是謂兩制又著令自觀文殿大學士至敷文閣待制為侍從官朝廷或詔近臣舉賢議事多云兩省諫議大夫以上尚書省侍郎以上而別言御史中丞學士待制乃為詳備近世相承通稱侍從固已疑混若泛言兩制則非矣

紹興二十四年春直學士院湯公思退以禮部侍郎同知貢舉時百官多闕大抵一人兼數職凡進士出身皆入試闈獨留監察御史王公綸蓋備圻號也內制既闕官遂降旨暫權適草劉婉儀進位貴妃制太上稱其有典誥體潤筆殆萬緡賜硯尤奇秦丞相不樂遭論列而去秦薨召還掌內外制知樞密院事垂相而病除大資政留守金陵即其鄉也未第時兄弟就食府庠至是人以為榮尋卒官予嘗草其致仕制云少則歌鹿鳴而薦于鄉老則釋麟符而居其里考昔人而或有在近歲以幾希贈官制云古所謂鄉先生者沒則祭于社而後世良二千石民亦奉嘗之爾於二者蓋兼之皆紀實也

故事正除六曹侍郎及雜學士以上遇辭免皆降詔不允給舍并權侍郎則否紹興二十七年六月戶部王侍郎師心辭給事中亦降不允詔書蓋舊官合答詔也是歲九月權禮部賀侍郎允中除給事中辭免亦降詔乃誤襲王例非故事也三十年正月權工部王侍郎晞亮遷夕拜不復降詔得之矣明年九月權禮部金侍郎安節亦遷夕拜又誤降詔自後往往無定論院官隨事申明改正爲善

淳熙玉堂雜紀卷中

淳熙玉堂雜紀卷下

詔報見於金坡遺事元豐三年八月丙申亦詔於尚書省樞密院用詔報至今守之其制首題學士院諮報尚書省或中書門下樞密院次入詞云云末云右謹具詔報某省伏候裁旨後題年月學士押字雖中間權臣用事官失其職獨此不廢又三省密院於百司例用劄付惟學士院云劄送他官司得省劄必前連片紙書所受月日乃敢押字惟學士院徑判押其首又吏魁有錄事曹案曰房皆稍擬中書尊內庭也祖宗時內制多避兩府親嫌亦有不許避者蘇文忠公之於弟文定公是也然終不自安乞郡而去紹興初范元良冲除學士以趙丞相鼎姻家特復置侍讀

學士以處之及秦丞相檜當國兄梓實為學士子燔繼為學士承旨亦嘗為禮部侍郎雖並緣元祐故事其實非也

國初又為學士官至八座已罷職或再來直院神宗改官制後中丞并權六曹尚書若兼內制亦止云直學士院舒亶等是也中興初詹又已為龍圖閣學士猶曰權直院其他如正侍郎已下多帶兼權汪藻等是也厥後程克俊林待聘楊愿等初以給舍兼權稍久乃落權字以為恩數至正尚書則帶兼權學士胡交修等是也乾道三年洪景盧萬奏請自庶官遷侍從便落權字正兼直院故先以起居郎權直院既遷中書舍人即落權字庚寅秋予以少蓬兼權直

院明年正除權禮部侍郎吏引近制申明合正為直院予固抑之兼權如故翰長王日嚴嚴亦不復問其後王季海淮以太常少卿兼權直院既除三字即徑落權遂為定例淳熙五年十二月必大自翰林遷禮書乃正兼學士蓋上所兼之官在正官下者皆不帶權非舊例也六年十一月遷吏書又升兼學士承旨且有內批付院云天官事繁今後非特旨撰述其餘並免

上自登極至今將二十年正除翰苑纔七八人皆登二府惟王日嚴以年踰七十除端明殿學士而去乾道癸巳曾丞相懷鄭參政聞張樞密說在二府或薦新政官正字崔大雅興詩入內庭以其資淺乃創

翰林權直之名月俸減學士直院三之一自學士承

兼權直院者院中餐錢不減明年冬以父憂去尋丁

母憂戊戌秋服闋復召為密院編修官史丞相浩當

國下史院訂論兼職名稱遂改為學士院權直蓋以

翰林乃內諸司總名難專指學士院也

淳熙己亥明堂大禮崔大雅已遷著作權直如故糧

料院止隨其官幫支賜二十疋兩大雅以狀申祕書

省省申朝廷趙丞相雄將上取旨遂用月俸例支學

士三之二 祖宗試文多在學士院近歲惟試館職

耳既得省劄召某人試即下太史局擇日報內侍省

差官一員充監門前一日學士宿院進策題候內批

依次早乃引試支左藏庫錢三十緡充餐錢試畢錄

策題并試卷依紹興三十年司諫何通遠溥以為言

太上欲復故事而人頗憚試首召朱熙載等次召劉

儀鳳等皆辭不就 太上諭湯丞相思退等擇二人

必令試且云蘇軾中制科猶試况餘人乎於是予以予

及同年程泰之大昌應詔具宣 上旨乃不敢辭已

而 太上欲除校書郎或謂過江選人無此例止除

正字乾道六年九月予以祕書少監寓直翰苑發策

試王仲衡希呂嘗賦詩寄程同年云當年給札踏金

鑾重到依然九月寒學士策詢學士策館職亦合祕

書官試祕書官自憐綠鬢非前度尚喜青衫總一般

時予寄語浙東程閣老程時為浙東提刑兼權莫矜

紅旆笑儒酸程答詩末句云有底滑稽堪羨處金蓮

燭底話窮酸始予庚辰九月與程同試兩人名皆有
大字明年試蔣希芳燁姓名俱連草頭又明年試王
東里程千里名連里字頻歲偶爾亦可書也按祖
宗朝館職者指昭文集賢史館之職也在內多升修
注出外則為帶職凡轉官奏補恩數皆厚故艱其選
必試而後除亦以限止無能之人自神宗罷館職
止是祕書省官與其他職事官無當不當尚循館職
之名況狀元不試餘人多徑除著作丞郎所試者校
書正字而已舊制云試前一日學士宿院故元祐中
蘇文忠公與鄧文惠公溫伯各進策題禁中點用文
忠所作及予與程同試時學士洪景嚴兵部尚書兼
學士楊元老椿亦並入至是予與鄭仲益同直鄭

為長官典故浸移乃始輸入不敢強之其後予再直
丙申二月召試許蒼舒遂修故事約程元成叔達並
入策題則輪撰

隆興初 上用 真宗故事輪講筵學士院官直宿
禁林每夕兩負以備宣引咨訪往往賜酒留款其後
以兩人難獨召若同召則議論難盡止命一負遞宿
自後益遴其選或國忌妨行香若有故負少及大暑
皆權免間遇除授宣鎖講筵官已入直率聞命蒼皇
而出至有不及伺候從吏借馬於內諸司者或偶值
本院官直宿就留鎖院若大除拜當有錫賜則不繫
當日與否往往特宣云每頭直未直
紹興辛巳明堂禮成以元顏亮背盟十月四日詔今

次明堂大禮合加恩臣僚權宜不鎖院不宣麻止降制給告並免辭免候事定日依舊隆興二年邊事改卜郊乾道二年冬雷罷二相皆未暇舉行乾道六年必大始奏復舊制

內制名色不一倣直時或未詳其體式故凡詞頭之卜者院吏必以片紙錄舊作於前謂之屏風兒予嘗跋王岐公蘇文定公詔草及謝表備言之至今不廢蓋其來久矣國初陶穀謂一生依本畫葫蘆殆謂是耶

凡鎖院或親被旨或受熟狀本院即關閣門今日某日有鎖院事閣門得之即關報御史臺集文臣職事官承務郎釐務官通直郎已上明日赴文德殿聽麻

宰相樞密皆不往惟輪參知政事一員押麻麻卷白內出閣門啓御封兩吏對展宣贊舍人南面搢笏叉手大聲摘首尾詞及階位姓名下數句并所除之官而讀之不盡宣也聽訖知閣門官以授參政參政付中書吏百官不拜而退若大詔令及冊后之類則宰執文武百僚俱入文亦盡讀拜舞然後退

禁中以鎖院爲重淳熙三年慶壽赦凡降麻官合加恩者用辛巳明堂例免鎖院宣制仍勿辭免九月三日中書進熟狀魏王愷恩平郡王璩永陽郡王居廣並加食邑食實封只乞降付院草制內夫人失於詳閱宣鎖程直院是夜進草明日告廷如式又明日內批付密院典字直筆吳慶慶降充紫霞被不令供

職主管大內公事慶國淑懿夫人劉從信降兩字夫人蓋懲其誤也

凡非時宣召院官

侍從已下及外官而祀

紫窄衫絲絢行入

殿廊有小黃門來導至便坐

上服紅半臂

用黃

門贊拜揖升殿奏對訖

上曰且坐先已設小兀子

得旨則側身虛揖而坐將退黃門贊云宣坐賜茶於

是中官進御前者忠佐授臣僚者賜酒亦然所用杯

不同侑以果實一釘其器分大小若二府則黃門雙

導上亦服窄衫宰相樞使坐高兀子執政紫團坐

而低賜茶酒亦如之或曲宴則酒五行亦或加多每

杯賜食初無定制

中興後凡除拜節鉞以上多由中書進熟狀院吏云

鎖中左者文臣也右選者武臣也逐房臨時呼院吏

取索是以知之惟草后妃太子宰相麻則不容知快

行數十輩來宣召云鎖小殿子既至便殿上服帽

帶諭以除授之意御前列金器如硯匣壓尺筆格糊

板水滴之屬幾二百兩既書除目隨以賜之隆興初

猶用此例乾道以後止設常筆硯而已退則有旨打

造不及例賜牌子金百兩立后升儲倍之

凡除拜加恩官在都下者既宣麻而院吏私錄本走

報希覬贈遺初無公移也而被受之官辭免者多云

準學士院報麻除授云云此非典故不應相承以為

例

獎諭臣僚或降詔或勅書院中自有定式近歲如大

理獄空及監司守臣有勞績若是庶僚皆合降勅書
三省樞密院往往誤批降詔院吏隨所得旨而行不
敢正也

翰苑印以翰林學士院印六字爲文背鑄景德二年
少傅監鑄上兩字微利自南渡京百司印無如此久
者尚書六曹惟禮部印是舊物然亦元豐改官制後
所鑄蓋文書稍簡故不刊耳

紹興辛巳五月詔學士院權寓皇城司而以院爲
欽宗几筵殿終制復舊

學士院舊號北門今在行宮和寧門內蓋沿北門之
制地迫皇城極爲窄隘汪尚書應辰兼權學士時
上屢令增葺竟以無地步而輟廳後即堂緣近歲

官止二員故分東西兩閣中有小龜頭榜曰摛文堂

蓋在京徽宗因廣直廬御書以賜強承旨淵明今

乃汪彥章內翰篆所篆太上又嘗書玉堂二字賜

學士周茂振鱗之刻石廳上

東閣窓下甃小池久無雨則涸傍植金沙月桂之屬

又有海棠郁李玉繡毬各一株西偏植金橘逼城根

株不能大花開時香滿院結實雖小而甘浙中未易

得也淳熙己亥夏侍講兵部尚書兼給事中王仲衡

入直示兩絕句云玉堂晝旦永暑風微款款飛花落小

池徙倚幽欄憑問訊夏鷲飛出萬年枝小池倒影弄

餘輝照耀虛簷極出奇亦杪不鳴風力軟闌萍翻藻

有魚嬉予次韻云東省南宮切太微夔龍行集鳳皇

池更戰殿閣薰風句坐覺微涼生桂枝紫禁同依日
月輝蒼顏獨愧羽毛奇永如明鏡雖堪俯笑汝星星
誰肯嬉予嘗發策試仲衡至是同為八座俱在講筵
唱酬頗多是時詩及院中景物故記於此
朝殿日皇太子宰相親王使相參政各有朱衣史二
人自下馬處前導至殿門樞密院及副樞密院簽書則紫
衣此外惟翰林學士有之又禁門內許以茶餼檐子
自隨與執政等

車駕將出孟享或過宮則應奉官及侍從以上朝于
後殿宰執有奏事侍從先退例過玉堂少憩若值冬
至元正則團拜堂上俟駕過就院門外上馬以從南
渡以來朝臣遇節序賜予多權停今經筵寒食重午

冬至尚賜節料錢酒其他侍從則三大節客省簽賜
羊酒米麪而學士院官若侍從以上兼領自從本官
或庶僚權直院獨三伏賜冰一檐時果五品品纔一
楪亦因與經筵官輪宿而得之書局自節中贈綠酒
醉缸院無淳熙乙未初伏必大以待制侍講賜流香
酒四斗熈寧二年時果七楪冰一檐視庶官直院為稍
增以短表謝支快行家食錢三千又折酒錢三百別
賜冰一檐翰林司關許云眼支食錢一千蓋侍從所
得者

十月旦賜錦襖子學士院觀察使簇四金鷄尚書執
政八搭暈錦宰臣使相天下樂例從左帑帑支得不
以時臨期隨品色假為領袖施之朝服三日而止識

者非之予自翰苑遷八座已亥十月值從駕恭謝景靈宮兵部尚書王仲衡未達朝儀弟用市錦予告之故計無所出予輟所服與之而馳取舊金鵬者自用暨追班問門吏魁趙軫與其徒頌予諄語予悟其意呼而告以雖班尚書猶兼翰林學士故可捨高從卑軫等愧謝而退

渡江後每遇開講罷講臨安治具侍講讀修法官紹興三十二年冬予爲左史趙清卿子禱知臨安初獻議盡罷百司饋送及所供飲饌時洪景嚴以內翰兼侍讀開講日學士院自置酒五行是後遂爲例乾道六年予與鄭仲益兼直院鄭兼侍講是秋開講鄭主席謂予亦院官當與其事予但簽書招客之目而以

不兼講讀不赴坐時胡邦衡銓以工待兼侍講坐中

賦覃字韻詩見及予次其韻有云寓直敢同東道主蓋謂是也

翰林學士初上舊制勅設甚盛中興後不復舉行予直院時除王日嚴爲學士院中支餐錢具五杯而已

故事大宴未再坐間學士院常爲館閣官具食蓋祖宗時內外制官無不自三館出館中之人往往前日僚友之舊道義之交不專以勢利高下爲心故每於是日小集從容談笑也近時具食雖如故乃設於學士院門幕次內蓋未嘗見玉堂主人也竊意前輩不爾淳化中太宗以飛白玉堂等四字賜翰林而

學士承旨蘇易簡會兩制於玉堂直祕閣潘謹脩與焉略可見也已上乃近世程致道俱麟臺故事所記乾道七年天申節貢院賜齋筵予時以少蓬兼內直乃督院吏治具吏白厨庫乏錢兼近已不講予曰故事既難廢況予身貳祕書而罷此禮乎命如故例然不過盤餐之類爾

必大父在翰苑獨負之日常多率數月輒丐去上必批降詔不允院吏申省乞時暫差官撰述乃委中書舍人如此再三遂爲定例徑封奏劄付中書後省數年來上數令薦詞臣爲代明示大用意必大每退避戊戌九月丁丑御藥院傳旨問近例院官有無三負者吏具上初政承旨洪遵學士史浩直院劉

珙又問紹興間故事吏復具八年曾開勾龍如淵皆爲直院而召孫近承旨三十一年何溥爲學士虞允文劉珙並直院後旬餘崔大雅服闋還朝上曰卿來適其時遂再兼權直十月復增莫子齊濟卒其後繼增趙大本彥中熊子復克予遂參預

淳熙玉堂雜紀卷下

必大試館職時

太上稱其文諭宰執陳公康伯朱公倬云他日令

掌制

今上受禪兩月自六察擢左史初對

玉音云向在王邸見卿詞科擬制雅宜代言不旋踵遂兼三字其後兩入翰苑首尾十年自權直院至學士承旨皆徧爲之其荷

兩朝知遇至矣歲月旣久凡涉典故及見聞可紀者輒筆之淳熙庚子進位二府蘇易簡玉堂之思每切于中因命小子綸哀爲一編略加訂其間多涉幾微非止溫木或刪或留僅得五十餘條前後脞錄辭無詮次釐爲三卷或可附洪氏翰苑羣書

後云壬寅八月十二日周必大題

朝佐頃者官桂陽獲觀

今丞相周公鑾坡錄愛而傳之茲如武林又得其
玉堂雜紀益聞所未聞蓋中興以來

九重之德美前輩之典刑恩數之異同典故之沿
革皆因事而見之此尤不可不傳也乃手抄一通
藏於家竊聞公在翰苑知無不言

朝廷有大命令人所不敢議者公從容敷奏皆當
上意凡所以障隄狂瀾護養元氣者豈止一事而
公不書何其謙也然盛德偉烈表表在人耳目公
雖不書其能使之弗傳哉紹熙元年重五日樵溪
丁朝佐謹書

丞相益公玉堂雜紀一編森得之矣矣字畫間有
舛誤每苦其難讀近訪丁懷忠觀甘泉書藏懷忠
不知森有此書出以相示森曰明月夜光天下之
所同寶也子獨能私有之乎亟假其本而參訂之
因系歲月于後紹熙辛亥仲夏一日眉山蘇森謹
題

揮塵錄卷上

朝奉大夫試秘書監兼侍讀楊萬里編

唐明皇實錄云開元十七年秋八月上降誕之日大置酒合樂燕百僚於花萼樓中尚書左丞相源乾曜右丞相張說率百官上表願以八月五日為千秋節著之甲令布於天下燕樂休假三日詔從之誕日建節蓋肇于此天寶七載八月己亥詔改為天長節其後肅宗以九月三日生為地平天成節史不書日文宗以十月十日生為慶成節武宗六月十二日生為慶陽節懿宗十月二日生為延慶節僖宗八月五日生為應天節昭宗二月二十日生為嘉會節哀帝十月三日生為延和節梁太祖十月二十一

日生爲大明節末帝九月十二日生爲明聖節後唐
明宗九月九日生爲應聖節晉高祖二月二十八日
生爲天和節出帝六月二十七日生爲啓聖節後漢
高祖二月四日生爲聖壽節隱帝三月七日生爲嘉
慶節周太祖七月二十八日生爲永壽節世宗九月
二十四日生爲天清節恭帝八月四日生爲天壽節
本朝 太祖二月十六日生爲長春節太宗十月七
日生爲乾明節後改爲壽寧節真宗十二月二日生
爲承天節仁宗四月十四日生爲乾元節英宗正月
三日生爲壽聖節神宗四月十日生爲同天節哲宗
十二月七日生避僖祖忌辰次日爲興龍節徽宗
十月十日生爲天寧節欽宗四月十三日爲乾龍節

太上皇五月二十一日生爲天申節今上十月二十
二日生爲會慶節而章獻明肅皇后正月八日生爲
長寧節宣仁聖烈皇后七月十六日生爲坤成節以
嘗臨朝故耳五代諸君節名不見於正史以鄭向開
皇紀考得之唐代宗十月十三日天興節見令狐綯
文集中唐順宗聖壽節見於齊抗會稽捨宅爲寺碑
後唐清泰帝千春節見於五代史晉家人傳皆亡其
日近董令升作誕聖錄不如是之詳也

祖宗神御像設在南京則鴻慶宮西京則奉先寺之
興先會先會聖宮之降真殿揚州曰彰武滁州曰端
命河東曰統平鳳翔曰上清太平宮及 真宗親征
北郊封泰山祀汾陰則有澶淵之信武嵩山崇福之

保祥華陰雲臺之集乾德六年即都城之南安陵之
舊城建奉先資福院爲慶基殿以奉宣祖藝
祖則太平興國之開先太宗則啓聖之永隆至大
中祥符中建景靈宮天興殿以奉聖祖其後真宗
之奉真仁宗之孝嚴英宗之英德皆在其側也又有
慈孝之崇真萬壽之延聖崇先之永崇以奉真宗母
后章獻明肅在崇真之旁曰章德章懿在奉先之後
曰廣孝章惠在延聖之後曰廣愛在普安者二元德
曰隆福明德章穆曰重徽元豐中神宗以獻饗先後
失序地偏且遠有曠世不及親祠者迺詔有司神御
之在京師寓於佛祠者皆廢徹而遷之禁中由英德
而上五世合爲一宮凡十一殿以世次列東西序帝

殿一門列戟七十二殿之西廡繪畫容衛公王名
羅立左右內有燕寢溫清之室玩好畢陳而母后居
其北改慶基曰天元后曰太始開先曰皇武后曰儷
極永極曰太定后曰輝德奉真曰熙文后曰衍慶孝
嚴曰美成后曰繼仁英德曰治隆其便殿十一日來
寧曰燕娛曰雲遊曰凝神曰天遊曰冷風曰太靈曰
丹臺曰靈崑曰昭清以五年十一月奉安帝后塑像
於新宮大赦天下繪像侍臣于後元祐初即治隆之
後宣光殿以奉神宗紹聖初闢宮之東偶爲顯承
殿以宣光殿故址爲徽音殿以奉宣仁聖烈建中
靖國元年詔以顯承介於一偏廟號未稱於是度馳
道之西東直大定南北廣袤地勢併撤府寺創爲西

宮建大明殿以奉神宗爲館御之首消曰遷奉親祠爲不桃之廟以示推崇之意曲赦四畿錄功臣後如元豐故事云

南京應天寺本後唐夾馬營大中祥符二年以太祖誕聖之地建寺錫名東京啓聖院本晉護聖營以太宗誕聖之地太平興國六年建寺雍熙二年寺成賜名二寺皆奉祖宗神御英宗以齊州防禦使入繼大統治平二年建齊州爲興德軍熙寧八年八月詔潛邸爲佛寺以本鎮封之賜名興德禪院仍給淤田三千頃

太祖嘗詔重修先代帝王祠廟每廟須及百五十間以上委逐州長吏躬親點檢索圖赴闕遣使覆驗

太常禮院重定配享功臣檢討儀相畫樣給付文編祠在晉州書傳無功臣可配太昊以金提勾芒配祠在陳州炎帝以祝融配祠在衡州黃帝以青風后力牧配祠在坊州高陽以玄冥配祠在澶州尚辛以稷配祠在宋州唐堯以司徒禹配祠在鄆州虞舜以繇配祠在道州夏禹以伯益配祠在越州商帝以成湯以伊尹配祠在河中府中宗太戊以伊陟臣扈配祠在大名府高宗帝武丁以甘盤傳說配祠在陳州周文王以師鬻熊配武王以召公配成王以周公旦唐叔升虞叔配康王以太公畢公配秦始皇帝以李斯蒙恬王翦配漢高帝以蕭何配文帝以周勃陳平劉章宋昌配景帝以周亞夫竇嬰申屠嘉晁錯配武

帝以公孫弘衛青霍去病金日磾霍光配宣帝以丙吉魏相霍光張安世配以上十帝並祀祠在長安後漢世祖以鄧禹吳漢耿弇賈復配明帝以東平王蒼栢榮配章帝以牛融趙意宋安配以上三廟並在河南府魏武帝以鍾繇荀攸程昱配廟在相州文帝以賈詡王卽曹眞辛毗配晉武帝以羊祜張華王濬杜預配二廟在河南府後魏孝文帝以王祥一肅長孫晟配後周文帝以宇文憲蘇綽燕公于謹盧辨配二廟在耀州隋高祖以牛弘高穎賀若弼配廟在鳳翔府唐高祖以河間王孝恭殷開山劉政令淮南王神通配廟在耀州太宗以長孫無忌房玄齡杜如晦魏徵李靖配廟在京兆府明皇以張說郭元振王琚配

廟在河中府肅宗以苗晉卿裴冕配廟在京兆府憲宗以裴度杜佑李愬配廟在同州宣宗以夏侯孜曰敏中馬植配廟在耀州朱梁太祖以劉鄩敬翔葛從周袁象先配後唐莊宗以郭崇韜李嗣昭符存審配明宗以霍彥威安重進任圜配石晉高祖以桑維翰趙瑩配以上並在河南府皆著之儀制是時吳蜀未平六廟帝朝闕而不載本朝曹武惠配享太宗武穆配享仁宗韓忠獻配享英宗文定配享徽宗父子配享自昔所無也

李和文遺事云仁宗嘗服美玉帶侍臣皆注目上還宮問內侍曰侍臣日帶不已何耶對曰未嘗見此奇異者上曰當以遺虜主左右皆曰此天下至寶

賜外夷可惜 上曰中國以人少爲寶此何足惜臣
下皆呼萬歲

李和文遺事又云其家書畫最富有吳道子天王胡
瓌下程圖唐淨心須菩提黃居寀竹鶴孫知微虎翰
幹早行圖梅鷄傳古龍江南畫佛唐希雅竹李成山
水唐畫公子出獵圖黃居寀雕狐圖黃筌雨中牡丹
李思訓設色山水周昉按舞折枝杏花徐崇嗣沒骨
芍藥江南草虫獨幅山水黃筌金盆鷓鴣大窠山茶
書有懷仁真迹集右軍聖教序貞觀蘭亭詩叙右軍
山陰帖樂毅論顏魯公書劉大冲序皆冠世之寶

熙寧八年四月岐王顥嘉王頊言蒙遣中使賜臣方
圓玉帶各一條准閣門告報著爲朝儀臣等乞寶

了家不敢服用 上命工琢玉帶以賜二王固辭不
聽請加佩金魚以別嫌詔并以玉魚賜之王帶爲朝
儀始于此

北齊顯祖高洋晉陽公李元忠南齊竟陵三蕭子良
隋長孫覽俱謚文宣孔子蓋出四謚之後大中祥符
元年始加玄聖二字後以避聖祖諱易一而至聖熙寧
中欲加謚至神元聖帝禮官李邦直以謂夫子周臣
也周室諸君止稱王執以爲不可卒從其議

元魏獻欲置學官上郡國高允表請制大郡立博士
二人助教四人學生一百人次郡立博士二人助教
二人學生八十人中郡立博士一人助教二人學生
六十人下郡立博士一人助教一人學生四十人其

博士取博開經典履行忠清堪爲人師者年限四十以上助教亦與博士同年限四十以上若道業夙成才任教授不拘年齒學生取郡中清之一人行循謹堪東循名教者先盡次及中等 帝從 郡國立學自此始事載允本傳本朝高承纂事物 原自謂博祿而不取此何耶

唐高宗改門下省爲東臺中書省爲西臺尚書省爲文昌臺故御史臺呼爲南臺趙璘因話錄云璘又曰武后朝御史有左右肅政之號當時亦謂之左臺右臺則憲臺未曾有東臺西臺之稱嘗記張鷟朝野僉載對天后爲戲語云左臺胡御史右臺王御史胡是也本朝李建中爲分司西京留司御史世以西臺目之

唐李栖筠爲御史大夫不樂者呼爲栖臺蓋斥其名也 太祖以歸德軍節度使創業後升宋州爲應天府 太宗以晉王即位升并州爲太原府 真宗以壽王建儲升壽州爲壽春府 仁宗以昇王建儲升建業爲江寧府 英宗以齊州防禦使入繼以齊州爲興德軍 神宗自穎王升儲以汝陰爲順昌府 哲宗自延安郡王升儲爲延安府 徽宗以端王即位升端州爲肇慶府 欽宗自定王建儲前已升中山府 太上以康王中興升康州爲德慶府 今上自建王建儲升建州爲建寧府宣和元年六月邢州民董世多進狀以 英宗嘗爲鉅鹿郡公又知岳州孫勰建言英宗嘗爲岳州防禦使詔加討論時邢州

已升安國軍遂詔邢州爲信德府岳州爲岳陽軍是
歲十月又詔以列聖潛邸所領地再加討論以
真宗嘗爲襄王升襄州爲襄陽府仁宗嘗爲慶國
公以慶州爲慶陽府英宗嘗爲刺史以亘州爲慶
遠軍神宗嘗爲安州觀察使以安州爲德安府又
爲光國公以光州爲光山軍哲宗嘗爲天平軍節
度使以鄆州爲東平府又爲均國公以均州爲武當
軍徽宗嘗爲寧國公以寧州爲興寧軍其後又以
徽宗嘗爲平江軍節度使並陞爲府太宗嘗爲睦
州防禦使陞睦州爲遂安軍
國朝承五代搶攘之後三館有書僅一萬二千卷乾
德以後平諸國所得浸廣太宗鄉儒學下訪搜訪

民間以開元四部爲目館中所闕及三百以上卷者
與一子出身端拱元年分三館之書別爲書庫目曰
祕閣

真宗咸平三年詔中外臣庶家有收得三館所少書
籍每納一卷及千卷判館看詳委是所少書數及卷
帙別無差誤方許收納其所進書及三百卷以上量
材試問與出身又令三館寫四部書二本一置禁中
龍圖閣一置後苑之太清樓以便觀覽八年禁王宮
火延燔三館焚蕪殆遍於是出禁中本就館閣傳寫
且命儒臣編類讎校校勘校理之官始於此也嘉祐
五年又詔中外士庶許上所關書每卷支絹一疋
及五百卷特與文資元豐中建祕書省三館併歸

省中書亦隨徙元祐中重寫御前書籍又置校對黃本以館職資淺者爲之又置重修晉書局不久皆罷去宣和初蔡攸提舉祕書省建言置補完御前書籍所再訪天下異書以資校對以待臣十人爲參詳官館爲校勘又以進士白衣充檢閱者數人及年皆命以官未畢而國家多故靖康之變諸書志不存太上警蹕南渡屢下搜訪之詔獻書補官者凡數人秦熺提舉祕書省奏請命天下專委守臣又有旨錄會稽陸氏所藏書上之今中秘所藏之書亦良備矣承平時士大夫家如南都戚氏歷陽沈氏廬山李氏九江陳氏番陽吳氏俱有藏書之名今皆散逸近年所至羣府多刊文籍且易得本傳錄仕官稍顯者家

必有書數千卷然多失於讎校也吳明可帥會稽百廢具舉獨不傳書萬里嘗啓其故云此事當官極易但僕既簿書期會賓客應接無暇自校子弟又方令爲程文不欲以此散其功委之他人孰肯盡心漫盈箱篋以誤後人不若已也

紹興初 昭慈聖獻皇后升遐外祖曾公公卷以江東漕兼攝二浙應辦用元符末京西漕陳向故事也朝論欲建山陵外祖議以謂 帝后陵寢今存伊洛不日復中原即歸附矣宜以櫓宮爲名僉以爲當遂用之紹興戊午 徽宗梓宮南歸有日丞相秦檜當相請以永固爲陵名先人建言北齊北奴皇后實名矣不可犯且叱奴夷狄也尤當避秦大怒幾陷不測

後數年卒易曰永祐近見邵博公濟所著小說詆先君此議然後知當時沮此議者即此人也
國朝百官致仕庶僚守本官侍從轉一官宰執換東宮官熙寧初歐陽文忠公始以太子少師帶觀文殿學士致仕示特恩也放謝表云道愧師儒乃忝春宮之峻秩身居副猷猶書殿之隆名自是以爲例國朝侍從以上自有寄祿官如左右正言二史給諫吏禮部郎中之類是也若庶僚曾經飾擢至於雜流甄敘志皆有別一見刺字便知涇渭元豐官制旣行混而爲一故王荆公有流品不分之語舊年如侍從致仕轉官遣表贈四官皆自其合遷官上加之今則加官至陞朝則轉贈僅正負郎而已

蒲傳正在翰林自入對 神宗曰學士職清地近非他官比而官儀未寵自今宜加佩魚遂者爲令見于神宗實錄東坡謝翰林表云玉堂賜篆仰淳化之彌文寶帶重金佩元豐之新渥 書舍人繫紅鞵犀帶自葉少蘊始舊假服色不 崇寧末王照尚書詳定勅令啓請許之自是爲仍許入銜二事具載詔書其後以除敕中不載多不署魚袋二字

揮麈錄卷上

揮塵錄卷下

祖宗朝最重先代陵寢每下詔申樵採之禁至于再
三守冢戶逐處長吏及本縣令佐常切檢校罷任具
有無廢闕書于曆子太昊葬宛丘在陳州炎帝葬長
沙在潭州黃帝葬橋山在上郡今坊州界高陽葬臨
河縣故城東高辛葬濮陽頓丘城南臺陰城唐堯葬
城陽穀林今鄆州界舜葬零陵郡九疑今永州界女
媧葬華州界夏禹葬會稽山今越州會稽縣商湯葬
寶鼎縣周文王武王並葬京兆府咸陽縣界漢高祖
葬長陵在耀州安北後漢世祖葬原陵在洛陽縣界
唐高祖葬獻陵在耀州三原縣東太宗葬昭陵在醴
泉縣北九峻山以上十六帝各置守陵五戶每歲春

秋祀以太牢御書名祝板諸處舊有祠廟者亦別祭饗商中宗帝太戊葬內黃縣東南陽武丁葬西華縣北周成王康王皆葬畢在咸陽縣界漢文帝葬霸陵在長安東南宣帝葬杜陵在長安南魏武帝葬高陵在鄴縣西晉武帝葬峻陽陵在洛陽後周太祖文帝葬成陵在耀州富平縣隋高祖文帝葬太陵在武功縣以上十帝置三戶歲一饗以太牢秦始皇帝葬昭應縣漢惠帝葬安陵景帝葬陽陵在長安東北武帝葬茂陵在長安西後漢明帝葬顯節陵章帝葬敬陵並在洛陽東南魏文帝葬首陽陵在偃師縣後魏孝文帝葬永寧陵在富平縣唐明皇泰陵憲宗景陵俱在奉天縣肅宗建陵葬醴泉縣宣宗正陵在雲泉縣

朱梁太祖葬興極陵在伊門縣後唐莊宗葬伊陵在新安縣明宗葬徽陵在洛陽東北石晉高祖葬顯陵壽安縣以上十五帝各置守陵兩戶二年一祭以太牢凡祭祀皆令長史行禮所用太牢以羊代之陵戶並以陵近小戶充除二稅外免諸雜差徭周桓王葬澠池縣東北靈王葬河南縣百亭西周山上景王葬洛陽西北附山庚元王葬渭陵在長安縣成帝葬延陵在咸陽縣五帝葬茂陵在扶風平帝葬康陵在長安西北後漢社帝葬上陵瑩中庚地安帝葬泰陵在長安西北順帝葬慎陽中帝葬懷陵並在洛陽西質帝葬靜陵桓帝葬宣陵並在洛陽東靈帝葬文陵在洛陽西北獻帝葬禪陵在渭城北魏明帝葬高平

陵在河清縣高貴鄉公葬洛陽瀍澗之濱陳留王葬
王原陵在鄴西晉惠帝葬太陽陵在洛陽魏文帝葬
富平縣東南魏孝靜帝葬鄴縣唐高宗乾陵睿宗橋
陵穆宗光陵僖宗靖陵並葬奉天縣西中宗定陵代
宗元陵順宗豐陵文宗章陵懿宗簡陵並葬富平縣
德宗崇陵敬宗莊陵武宗端陵並葬三原縣昭宗和
陵葬河南緱氏縣梁末帝葬伊闕縣後唐末帝葬明
宗陵內以上三十八帝常禁樵採此乾德四年十月
詔也著于甲令其後又詔曾經開發者重製禮衣裳
服棺槨重葬焉東晉以降六朝陵寢多在今金陵丹陽
之闕皆可考職而制書不載者當時江左未平故耳
嘗纂歷代陵名自漢高帝建名以來雖后妃追崇僭

霸無有遺者今行於世

國朝凡登從班無在外閑居者有罪則落職歸班亦
奉朝請或黜守偏州甚者乃分司安置不然則告老
桂冠熙寧間始置在外宮觀本王荆公意以處異論
者而荆公首以觀使閑居鍾山者八年

官制後惟光祿大夫及中散朝議二大夫分左右增
磨勘而已初非以科第分也元祐間范忠宣當國始
帶左右紹聖初罷去大觀二年又置中奉奉直二大
夫徹中散大夫朝議大夫左右字紹興初樞密院編
修官楊愿啓請再分左右自是以出身爲重

前宰相爲樞密使者宋元憲富鄭公文潞公陳秀公
宣和二年鄭華原以故相領院事紹興七年宰相秦

檜亦以前揆拜樞密使未幾復登庸近歲張魏公亦然李邦直許冲元曾令綽韓師朴為二府後皆入為尚書然不久復柄用惟令綽竟止公坐

舊制樞密使知樞密事奏薦子弟皆補班行故富鄭公之子紹京文潞公之子貽慶皆為閤門祗候元豐後方授文資

神宗朝詔樞密院編修經武要略以都承旨張誠一提舉誠一武臣也乞差編修官二員詔以王正仲胡完夫為館職詔令兼之是夕忽御批提舉改作管幹詰朝執政改啓上所以云已差知職編修豈可令武臣提舉不樞密院統修官創自也樞密院舊皆武臣如平旨亦用熙寧中王荆公怒李評罷去命

曾令綽為都承自是始吏用文臣矣

仁宗以太中祥符七年由慶國公出閤隆興初易特進封慶國公嘗以故事啓之遂上章辭不敢受改封榮國然王將明白蒙亨宣和間皆封慶公而不辭豈忘之耶

國朝范魯公質王文獻溥魏宣懿仁浦秉鈞史館昭文集賢三相俱全太宗初即薛文惠居正沈恭惠

倫盧多遜真宗咸平二年李文靖沆向文簡

敏中呂文穆蒙正仁宗至和三年劉文忠沆文潞

公彥博富鄭公弼元祐初司馬溫公為左僕射文潞公平章軍國重事呂正獻同平章軍國事皆三相也至三年溫公薨文呂二公在位而呂汲公大防范忠

宣統仁為左右僕射殆四相然不久也

本朝宰相兼公師者范晉公王文獻趙韓王薛文惠王文貞丁晉公馮文懿王文公呂文靖韓忠獻曾宣靖富韓公文潞公呂正獻蔡師垣秦師垣陳魯公而已餘皆罷政後拜近日惟張魏公自外以少傅再拜右揆本朝三入相者趙韓王呂文穆文靖張鄧公文潞公蔡元長雖四入而不克有終 國朝自外拜相者文潞公韓康公章子厚近年陳魯公亦曠典也元符末曾文肅自知樞拜相是夕召文昭鑠宿禁林而對喻旨草制昭力辭 上云弟草兄麻太平美事禁中已檢見韓絳故事矣不須辭文昭始拜命蓋熙寧初韓康公入相實持國當制 國朝以來兩家而

已今坡遺事載錢希白為文僖草麻雖云儀同鈞衡實未嘗秉政也

國朝宰相享耆壽者宋惠安八十張鄧公八十六陳文惠八十二富韓公八十一杜祁公八十宋元獻七十九李文定七十七曾宣靖八十龐穎公七十六蘇丞相八十二文潞公雖至九十四而薨貶秩中蔡師垣亦九十一晚節拘籍南遷殂於中路不得全有富貴考終

國朝名公多厄於六十六韓忠獻歐陽文忠司馬溫公王荆公蘇翰林而秦師垣亦然 國朝宰相登庸年少者宋常山春明退朝錄備見之然無逾近歲范覺民丞相廷告曰方三十一但壽止三十七其後張

魏公入相亦未四十且太夫人庸健罷相之外遷謫居外幾二十年後雖再入竟不拜元宰 國朝身爲宰相壽考康寧再見其子入政府者惟曾宣靖一人而已

呂文穆相太宗猶子文靖恭眞宗政事相仁宗文靖子惠穆爲英宗樞副爲神宗樞使次子正獻爲神宗知樞相哲宗正獻孫舜徒爲太上皇右丞相繼執七朝政眞盛事也

國朝一家爲宰執者呂氏最盛旣列于前矣父子兄弟者韓忠憲億子康公絳黃門維莊敏績范文正仲淹子忠宣純仁左轄純禮石元懿熙載子文定中立呂叅政餘慶弟正惠端陳叅政恕子恭公執中曹武

惠彬子武穆瑋任安惠中師弟康懿中正張叅政均左轄瑒王惠獻化基子安簡舉正陳文忠堯叟弟文惠堯佐王文献溥孫康清貽永章文憲得靖從孫樞密叅丞相惇王樞密博文子忠簡疇吳正肅育弟正惠充曾宣靖公亮子樞密孝寬韓魏公琦子定忠彥曾孫樞密肖胄胡文恭宿秩左丞宗愈梁懿肅適孫中書子美蔡忠懷確子樞密懋林文節希從子中書樞密蔡太師京子樞密攸鄧樞密洵武弟左轄洵仁近日如叅政錢端禮之於文信亦一家而叅政洪适樞密洪遵爲伯仲數十年未見也

韓奉常治之妻魯國太夫人文氏潞公之孫魏公之孫婦儀公之冢婦呂穆之外孫魯簡肅之外曾孫呂

文靖之曾外孫見其子肖曾為樞密塔億年為資政殿大學士儀同執政他子與孫俱被飾擢壽逾八秩婦人中罕有唐張延賞苗夫人可儷之也

錢武肅鏐自唐乾寧中盡有二浙之地享國五世至忠懿王俶以板圖來歸改封鄧王子弟皆換節旄其後第十四子文僖惟演以文章進仕昭陵為樞密使文僖子次對暄次對子少垣景臻尚秦魯公主生子伯誠忱亦至少師他子忠授鉞伯誠子處和端禮今叅知政事忠懿兄廢王悰之子希白易希白子修懿明逸子飛彥遠兄弟對掌內外制父子又中大科子飛子穆總元祐中入禁林穆子遜叔伯言至樞密直學士他位顯庸尚多雖間有以肺腑進然富貴文物

三百年相接

晏元獻夫人王

妹也元獻方

彥清朱聖子

硯一奇甚王氏舊物

氏朱之孫女適洪景

古犀帶一亦元獻舊物今亦藏滕氏嘗於千濟子洪

處見之

雍孝聞蜀士之秀也元符末有聲太學學者推

崇寧初省試奏名第一前此屢上封事剴切

已默識其名至是殿策中力詆二蔡及時政

徽宗大怒減死竄海外宣和末上思其忠親

臣超之女樞密

公婿馮文簡文

濟俱秉國政元

以相授號傳有硯

又有

藏滕

古

用之

塔蔡

三

雍

孝聞昨上書致罹刑辟忠誠可嘉特開落過犯授修武郎閣門宣贊舍人命放而孝聞死矣於是錄其子子純為右選紹興初從張魏公入蜀魏公令屬趙喆軍中喆誅子純坐編管既死魏公怜之後致其子安行一官紹興間以告訐流嶺外不知所終三世俱以罪廢與前所紀諸家不侔然亦不幸也

吳越國忠獻王錢佐薨其弟侗襲位未幾為其大將胡進思所廢時忠懿王俶為台州刺史進思迎之之元豐中王之孫暄知台州其子景臻自郡入朝也尚仁宗女是為秦魯長主靖康末胡騎犯闕主避秋南來日遂卜居後數年詔即州賜第主享之二十年壽八十六薨于天台其子忱居之又二十年官至少師

年亦八十餘少師子即處也處和之女又自台州被選為王妃去歲處和既為執政則營甲第南北相望甚夥一家盛事常占此境

錢文靖呂文靖知制誥衣綠張益之友直鄧公子也為天章閣待制勾當三班院侍宴集英殿猶衣緋仁宗顧見即賜金紫召呂文穆及許冲元衣緋蔡元長王子發官制行後

季華琰為樞密直學士正議大夫衣綠

熙寧中神宗命館職張載往兩浙劾知明州苗振

呂正獻與御史程伯淳俱言載賢者不當使鞫獄上曰鞫獄豈賢者不可為之事耶弗許

國朝有東湖徐俯所記太上皇聖語其略云太宗

正行司將至行在南... 宗子所居當作屋百間... 上
曰舍宇固非今所急然事有不得已者故春秋於此
事得其時制則不書不書者聖人之所許也... 時營
宇之制一下百姓輒受弊蓋緣州縣便行科... 矣
又嘗詔宰相等曰為法不可過有輕重惟且... 以必
行則人不敢犯太重... 決不能行太輕則不足禁姦
朕嘗語徐俯異時宮... 有所禁初令之曰必行軍法
而犯者不止朕... 共理... 常法處之後更無...
者乃知立法貴在中... 則所... 可行也
淳化三年西夏... 遣使虜鶻號海東青上賜詔
曰朕久罷畋遊... 賜大卿地控邊塞時出捕獵今
還以賜卿可領... 且和末耶律禧由此失國嗚呼

太宗聖矣哉

宣和中蔡居安提舉秘書省夏日會館職于道山食
瓜居安令坐客徵瓜事各疏所憶每一條食一片坐
客不敢盡言居安所徵為優欲畢校書郎董彥遠連
徵數事皆所未聞悉有據依坐客咸嘆伏之識者謂
彥遠必不能安後數日果補外

曾文肅帥定武一日晨起忽語諸子曰吾必為宰相
然須南遷請其所以公曰吾昨夕夢十郎綠袍北向
謝恩豈非他日貶司戶之徵乎後十年累登庸既為
蔡元長所擠徙居衡陽已而就降廉州司戶叅軍敕
到取幼子緝朝服以拜命果符前夢十郎即緝排行
也張咸漢州人應制舉初出蜀過夔州郡將知名士

也一見遇之甚厚因問曰四科優劣之差見於何書
無以對守曰載孟子注中因檢示之且曰不可不牢
攬之也張道中漫思索著論成篇至都閣試第一似
此為首題張更不佇思而就王文范淳夫也覽之大
喜過閣第一黃元文叔愚能記守之姓名嘗以見告
今已忘之張即魏公迺翁也

已酉歲二月金人舉國南寇時 太上駐蹕維揚虜
既次臨淮郡相距甚邇有招信尉以所部弓手百餘
人拒敵是日也塵氛蔽日虜初不測其多寡遂相拒
踰半日尉與衆竟死不退於是探騎得疾走上聞乘
輿百僚僅得南渡儻非尉悉力以拒其鋒俾探騎得
上聞則殆矣尉之姓名不傳於世可恨友人王彥國

獻臣能道其詳他日當問之為求大手筆作傳近見
程可久云

郭楨字仲微仕至龍圖閣直學士權知開封府幼孤
母邊更嫁王氏既而母亡楨解官服喪知禮院宋祁
言積服喪為過禮請下有司博議因馮元等奏聽解
官中心喪申喪蓋始于楨

揮塵錄卷下

國

推
摩
年

